



**Siunissaq qiviarlugu qanoq iluuseqarluta isumaginnermut ingerlatsinitsinni atorfinitsitsinikkut, ilinniartitsinikkut, pikkorissaaqqinnikkut sulisunillu ilinniarsimasunik annaasaqannginnissarput qulakkeerumallugit 2017-imi ukiakkut ataatsimiinnissami saqqummiunneqartussamik periusissanut iliusissanullu pilersaarusiornissaannik Naalakkersuisut peqquneqarnissaannik Inatsisartut aalajangiiffigisassaannik siunnersuut.**

(Inatsisartunut ilaasortaq Peter Olsen, Inuit Ataqatigii

(Siullermeenera)

Qujanaq periarfissarsigatta inunnik isumaginninnermut siunnersortit ilinniarnerminni sulinerminnilu atugaasa oqallisiginissaannut. Qularutissaanngilaq nunami maani inunnik isumaginninnermut siunnersortit sulinerat artornartuummat aamma inunnik isumaginninnermut siunnersortit inunnillu isumaginninnermut siunnersortinut assistentit il.il. amerlasuunik artornartunik suliaqartarmata, aaqqivigiuminaatsunik pissutaalluni aamma innersuussivissaaleqisarneq. Inatsisit politikikkiku malinnaavigineqarnerup allangormat aamma puullaqaqinassaqaq paasiniaqqissaassallugit innuttaasunik kiffartuussineq, innersuussinerit eqqortut ilitsersuutillu nutaat aamma aaqqiissutissarsiorneq pisut ilaat eqqarsaatigalugit sulii periarfissaanngitsunik.

Demokraatini nuannaarutigaarput uani pisumi Naalakkersuisut suliniutissatik amerlasuut allattorsimammattigit. Suliniutit aalajangeriikkat aamma aallarteriikkat tamanna tunngavigalugu. Immikkut nersualaarussuppagut kommunit ilungersorlutik allangortiterisut aamma ajornartorsiutinik iluarsiniarlutik suliaqartut, piffissaq ungasinnerusoq isigalugu eqqarsartut aamma isumatusaartumik inunnik isumaginninnermut siunnersortitut atorfiit eqqarsaatigalugit, aammali qularutissaanngilaq atukkat allarpassuit aamma oqallisigisariaqaraluarigut.

Tassungali atatillugu tigussaasumik sunik ilanngussisinnaavugut?



Assersuutigalugu suleqataaffigisinnaavarput kommunit Namminersorlutillu Oqartussat tamarmik qasusarunnaarsaasalernissaasa qularnaarnissaa, qasunartunik suliaqarneq inunnik isumaginninnermut siunnersortit sulinerminni avatangiisaanni ajornartorsiutit annersarimmassuk. Tamatuma saniatigut aamma qularnaassavarput paarsisut, security politiillu suleqatigilluarnissaat sumiiffinni pisariaqartitsiffiusuni. Aamma qularnaassavagut suleriaatsit ilitersuutillu ersarissut atuaruminartullu, atoriaannanngorlugit aammalu qaavatigut sukumiisumik pikkorissumillu ilitersuussisarnissamut aaqqissuussisariaqarpugut, uangut eqqarsaatigut naapertorlugit pinngitsoorani atorneqartartussamik.

Aamma suleqataaffigisinnaavarput sulianut tunngatillugu immersoqatissaqartarnissaq, tassani inunnik isumaginninnermut siunnersortit inatsisinut, tarnikkut aamma ileqqorissaarnermut tunngasunik ilitersorneqarsinnaanngorlugit kiisalu ilinniakkamut tunngatillugu nalornissutit pillugit.

Naggataatigut aamma inunnik isumaginninnermut siunnersortit peqatigiiffiat qaninnerusumik oqaloqatigineqartarnissaa ujartueqataaffigisinnaavarput aamma sullivinni ilinniarsimanngitsut aamma peqataanik sulissutigisinnaavarput kommunini naminersorlutik oqartussnailu assigiinngitsunik suliallit ataqatigiinnerusumik suleqatigiissinnaalernissaat, immikkoortumi unamminartut suliarisinnaajumallugit.

Isertussanngilarput Demokraatini inunnik isumaginninnermut siunnersortinuinnaq siumut isigaluni pilersaarusiornissamut taarsiullugu kissaatiginerugatsigu nuna tamakkerlugu iliuusissanut pilersaarusiortoqarnissaa pingaartillugu tikkuarlugu suliniutit sorliit ukiorpassuarni aggersuni sualummik meeqqat inuusuttullu ikiorniarlugit atorneqartassanersut. Aamma pilersaartut aaqqissuussaq, paasiniarlugu qanoq iliorluta - piffissaq ungasinnerusoq isigalugu aaqqiissutissanik utaqqinitsinni aamma ilinniartitaanikkut inuiaqatigiit sumut ingerlanerat takussiillugu - isumagisassaneripput ersarissassallugu kommuninut, Namminersorlutik Oqartussanut, innuttaasunut nunanullu allanut nunami maani nukillalaarnartumik amerlassusillit inunnik isumaginninnikkut suliaassat artornartorsuit qanoq iliuseqarfigilersaarnerlutigit.



Peqataanik aamma ersarissumik takutittariaqarparput meeqqat eqqarsaatigalugit qanoq suliniuteqarnerluta.

Politikkimiinnaangitsoq aammali suliniutit atortussanngortinneqarsinnaasut, siunnersuutit atorsinnaarpasissut kiisalu paaseqatigiinnissamut aaqqiissutissat eqqarsaatigalugit, massakkorluinnaq nunami maani ajornartorsiutigut imaannaangitsut iluarsiivigiumallugit.

Isumaqarpugut inunnik isumaginninnermut siunnersortinut siumut isigaluni pilersaarusiornissaq naammangitsoq aamma isumaqarpugut Naalakkersuisut atortussanngortitsisinnaasut pilersaarusiornissaasullu suliarfik sumut atorniarnarlugu, taassumammi pilersaarutip ilaa maani oqaluttarfimmiit ullumi nassuerutigineqarpoq. Siunissami sulinissamut qilanaarpugut aamma isumaqataavugut pineqartut sulinerminni atugaat pitsanngorsartariaqartut, taamaattorli innersuussutigissavarput iliuseqarnissamut qaninnerusumik aaqqiisoqassasoq siumut isigaluni pilersaarusiornermut naleqqiullugu.

Taamatut oqaaseqarluta siunnersuutip itigartinneqarnissaa inassutigaarput.